

李文忠公奏稿

李文忠公奏稿

卷之三十六目錄

近省隄河工費摺

光緒六年正月二十七日

陳占箴請照原獎片

光緒六年正月二十七日

議購鐵甲船摺

光緒六年二月十九日

覆奏防兵情形片

光緒六年二月十九日

德國兵官換給寶星摺

光緒六年二月二十六日

蚊船四隻撥赴南洋片

光緒六年二月二十六日

紳捐備濟社片

光緒六年二月二十六日

直隸請停分發摺

光緒六年二月二十六日

遵旨密籌防務摺

光緒六年三月初一日

奏調奎斌片

光緒六年三月初一日

請撥海防經費摺

光緒六年三月初一日

請撥南漕摺

光緒六年三月初五日

請獎英法官學官廠洋員摺

光緒六年三月十六日

商局官帑分年抵還摺

光緒六年三月二十七日

覆陳招商局務片

光緒六年三月二十七日

請緩蘆課奏銷摺

光緒六年三月二十七日

毅軍北調請加餉摺

光緒六年三月二十八日

李文忠公奏稿卷三十六

全集一之三十六

桐城吳汝綸編錄

近省隄河工費摺

光緒六年正月二十七日

奏爲光緒五年附近省城隄河歲搶修工段丈尺動支銀數循案開單奏報仰祈

聖鑒事竊照附近省城河道隄工如深澤無極邢州安平博野蠡縣高陽等境之滋河潞龍河隄任邱縣之千里隄安州之南北隄雄縣之南老隄西槐文河隄趙村壩保定縣之清河埝或工段縣長或地居險要皆關民生利害又新開趙王河工長六十餘里節實西淀漲水蘆僧河工長一百三十里分減大清河水勢均須認真修防前經奏定每年在於清河道庫河淤地租項下撥銀三千兩以爲各工采購料物搶修之用免其造冊報銷經工部覆准仍

令工竣時開單奏報嗣因河淤地租不敷動支又經奏准在於清
河道庫堡船稅夫生息項下按年動撥在案光緒五年開凍後即
仍照數撥給銀兩購備椿料費成前署清河河道劉樹堂駐工督辦
夏秋雨水較多西北山水匯流進注各河疊次盛漲隄壩節節出
險屢經該道督率印委分段搶堵茲據會同藩臬兩司將工段丈
尺動用銀數遵照定章詳報前來除民夫土方等項仍歸民辦外
所有搶修椿料用款逐一確核無浮理合開具開明清單恭摺具
奏伏乞

皇太后

皇上聖鑒敕部知照謹
奏

陳占鼐請照原獎片

光緒六年正月二十七日

再臣會保潮州等處勸辦晉豫賑捐出力員紳內有工部主事陳占鼐請以直隸州知州分發省分儘先補用旋經吏部覆稱尋常勞績不准保免補免選應將該員改爲候補主事後以直隸州知州分發省分儘先補用臣查該員陳占鼐前經臣丁日昌奏派出洋疊赴新嘉坡暹羅小呂宋檳榔嶼麻六甲各埠竭誠勸辦往返重洋數萬里風濤出沒艱險備嘗捐得賑款實銀八萬兩全活飢民甚眾實屬異常出力業於光緒四年五月二十九日經臣奏明奉

旨陳占鼐著俟事竣後准其從優請獎等因欽遵在案誠以該員遠赴南洋勸集巨款懋著勤勞與尋常勞績不同是以豫爲聲明奏予優獎今若改照尋常例章核議實不足以示區別自應欽遵

前奉

特旨優獎仍將該員陳占鼇以直隸州知州分發省分儘先補用俾昭激勸理合會同前福建撫臣丁日昌山西撫臣曾國荃河南撫臣涂宗瀛附片具陳伏乞

聖鑒訓示謹

奏

議購鐵甲船摺

光緒六年二月十九日

奏爲籌辦海防通融挪款先購鐵甲船二隻以壯聲威而備戰守並豫籌交收調撥事宜恭摺仰祈

聖鑒事竊臣

奏

寄諭籌議海防購船並代福建等省定購蚊船及碰船兼快船以備分布各口等因欽遵在案臣於上年十月覆陳海防摺內聲明南北洋口岸叢雜不能處處設防必購置鐵甲等船練成數軍決勝海上乃能以戰爲守擬擇其與中國海面相宜者酌量訂購荷

蒙

俞旨許爲要論總理衙門籌議南洋海防經費摺內稱土耳其所定八角臺鐵甲船兩隻已發電信詢出使大臣李鳳苞查明如未出售而價不甚昂自應購備臣亦函屬李鳳苞隨時探問旋據函

稱遵由巴黎致書英海部詢以實價若干先因俄人欲購以禦英
故英人急購之今或肯轉售等語又接李鳳苞十二月二十四日
電報八角兩鐵甲英肯轉售兩船實價其英銀五十四萬三千三
百八十磅合中國銀兩核計約二百餘萬兩之譜頃又接李鳳苞
同日函稱該鐵甲船一名柏爾來一名奧利恩英海部尙書諄囑
當趁中國未開鄰衅之前成議其價分毫不能再讓等語臣前詢
之出洋學生劉步蟾等據稱在英時曾上該船閱過甚爲堅固合
式夫中國購辦鐵甲船之舉中外倡議已閱七年沈葆楨丁日昌
等斷斷持論以爲必不可緩臣深韙其說祇以經費支絀迄未就
緒近來日本有鐵甲三艘遠敢藐視中國耀武海濱至有臺灣之
役琉球之廢彼旣挾所有以相陵侮我亦當覓所無以求自強前
李鳳苞來函謂無鐵甲以爲坐鎮無快船以爲迎敵專恃蚊船一

擊不中束手受困是直孤注而已洋監督曰意格條議亦謂能與鐵甲船敵者惟鐵甲船與巡海快船敵者惟快船故鄰有鐵甲我不可無若僅恃數號蚊船東洋鐵甲往來駛擾無可馳援必至誤事等語曰意格由法國水師出身現帶藝徒在洋學習製駛聞見既確多閱歷有得之言西洋均屬島國海口水深不似中國各口之淺其大號鐵甲喫水至二十六七尺購價至二百餘萬者中國無所用之且船既笨重能來中國者亦少土耳其八角臺船喫水十九尺九寸用之中國海面抵禦日本及西洋來華之鐵甲最爲相宜且甲厚樣新似出口本鐵甲之上日本聞我有利器當亦稍戢狡謀向來洋廠訂造鐵甲須三年後方能下水今英國既肯轉售其柏爾來一船俟訂定後匯給現銀即可來華奧利恩一船須遲一年後交付值此多事之秋得兩船先後來華稍張聲勢較之

定造需三年之久者緩急懸殊尙覺合算臣與總理衙門往復兩商意見相同一面由電信覆知李鳳苞屬其與英海部切實商訂如何分期兌付詳細驗收再行專函商辦惟是此項船價南北洋海防經費以各省關報解甚微積存無幾近又籌購蚊船碰船竭力集款無可再撥若機會一失中國永無購鐵甲之日卽永無自強之曰殊屬可惜又查蚊船宜用於內洋淺港之處福建海面寬深臺灣尤形孤懸口岸歧錯卽有數號蚊船難敷防守必須得力水軍隨宜策應乃爲活著現擬通融辦法福建已先後奏明定購蚊船四隻碰船二隻內蚊船價銀赫德原定每隻約需銀十五萬兩何璟奏稱兩船約需費三十餘萬同新式兼碰快船赫德原定兩隻需銀六十五萬兩續又申呈應帶之水雷船未計其內總理衙門奏稱碰船兩隻約需銀六十萬兩均係傳聞之誤臣就赫

德原訂文單核計其該約需實價銀一百三十萬兩似可暫緩購置卽以此款先買鐵甲一號專歸臺灣防剿福建調撥如有一鐵甲輔以原有之福勝建勝兩蚊船再擇船政兵輪之堅利者配之練成一軍料敵所向相機戰守則臺防可固倭患可弭所需款項現有部撥三十萬兩該省奏明籌備三十餘萬圓約得二十五萬兩又奉

旨令續籌六十萬兩果能如數解齊足可抵買鐵甲之用查戶部原撥海防經費福建洋稅釐金兩宗每年應解南北洋者約四五十萬去歲部議准其截留原爲經營臺防起見後山之役現既停辦亦可撙節若干現據李鳳苞函報柏爾來一船交價後卽可赴華臺防尤爲急需自應卽將此船撥歸閩省調用擬請旨敕下福建將軍督撫臣於稅釐項下籌撥船價合之原有的款

先湊成一百萬兩俟李鳳苞與英定議卽由臣知會剋期匯付以
便船價兩交免致失信於人如此則以該省應解之費籌該省應
辦之防尤爲義不容辭南洋擬購之砲快船二隻應需六十五萬
兩茲抵購鐵甲一船所短約僅三十數萬兩將來或由出使經費
續撥或由京外設法勻湊尙易爲力奧利恩一船據稱須一年後
交卸亦可分期籌匯價銀俟該船到華臣當與南洋大臣隨時會
商調派合之原有蚊砲及各兵輪船練成一軍無論何處有警不
分畛域遣令援應庶幾聲威較壯海防稍有端倪大局不無裨益
惟英國磅價隨時低昂合之中國銀兩不能豫定確數計兩船磅
價合銀二百萬已有盈無絀將來交收及運送來華需費亦不可
豫計必應寬籌窄用臣與李鳳苞深知帑項艱絀事竣核實開報
斷不任經手者稍有浮冒並請

救下閩浙督臣船政大臣豫行選派管駕及輪機生徒舵水等六十人赴英隨同所雇洋員在船歷練其學習期滿之學生亦可附搭幫帶回華隨時與李鳳苞面商妥辦至鐵甲船到華以後修船須有陽基上海及廣東黃埔船塢喫水二十尺以內之船尙可設法修理而造就人才尤爲急務駕駛雖有學生肄習而司軍火司帆纜司機器及管事舵水等人亟宜由練船學堂認真教導挑選源源濟用萬不可以遊手充額卽舊有之兵輪船亦宜陸續汰換乃可漸收實效蓋鐵甲船購成後事務正繁措注稍不如法易滋流弊臣旣創斯議不敢置身事外福建所購之船雖專供一省之用將來船到後管駕人員如何遴派教習西人如何延訂及一切布置之方臣當與閩浙督臣船政大臣隨事商辦冀可漸有進境再近年閩廠經費不敷修船養船復耗其半現有快船圖式及出

洋學生陳兆翱等精通製法終以款絀未能仿造臣比已兩商黎兆棠屬其到任後察酌情形停造尋常木船專造快船此項工竣遲速與購之外洋者相等而與鐵甲船相輔並行為用甚大惟養鐵甲船之費逾於尋常輪船數倍未便責令船政供支查福建一省額設水陸兵數至六萬餘勇營在外今既另設輪船水師則原有之外海戰船與各路綠營之兵分防之勇當可量加裁減如能於通省中酌去一二成卽以其餉供養鐵甲等船之費綽有餘裕應請

敕下福建督撫臣遵照正月間

諭旨將水陸師營分別酌量裁汰庶節流卽以開源日久不致竭蹶矣所有籌辦海防通融挪款先購鐵甲兵船並豫籌交收調撥事宜恭摺由驛密陳伏乞

皇太后

皇上聖鑒訓示謹

奏

覆奏防兵情形片

光緒六年二月十九日

再欽奉正月二十八日

寄諭有人奏天津防兵難恃請飭認真整頓一摺天津駐紮水陸防軍原以該處爲京師門戶必須餉足兵精方足以資捍衛若如所奏該軍營官剋扣兵勇劫掠等弊明查暗訪實力整頓總期一緩急將何足恃李鴻章身任統帥責無旁貸著將各營將士驕奢易之弱者汰之有無剋扣劫掠等弊明查暗訪實力整頓總期一兵得一兵之用不致虛糜餉糈方爲不負委任等因欽此臣查津防水陸各營合計僅及萬人提督周盛傳統盛軍步隊十一營馬隊五營共八千人駐紮小站馬廠等處距津百餘里地屬閒曠便於屯操營規尙爲整肅其分駐天津城外者只總兵黃金志所帶推軍一營練軍三營總兵趙孟坤親兵一營提督鄭國榜水師一

營津郡重地計尙不足三千人因中外輻輳人煙叢雜不宜多駐
兵勇致滋事端閒有革勇游匪圖混生事立即擒獲懲治不稍寬
貸臣駐津十年以來兵民相安貿易日盛此爲確證明查暗訪實
無兵勇劫掠驕蹇怨讐之事餉源支絀年甚一年淮軍各營久不
能按月放足而每年支給九關略敷口食逐日早晚點名看操人
數既不准少剋扣從何而來此閒自輪船通行過客雲集閒有向
各營求助川資者所欲不遂動輒騰謗言者或展轉誤傳擴拾入
告究無實蹟可指至謂臣不敢過問尤不近情臣自咸豐三年卽
出從軍旅與兵事相始終嗣在蘇浙剿粵逆北路剿擒匪先後統
軍十萬眾尙無騷擾之名亦無驕兵悍將不敢過問之事今捍衛
畿甸憑仗

威稜僅統萬人何至選懦若此當爲

聖明俯鑒至謂緩急雖恃有不得不豫爲聲明者如遇內地賊匪
臣兵力雖單餉力雖薄才力雖甚竭蹶自忖尙可制勝如遇各國
憑陵激厲孤軍支持門戶勝負卽不可知斷不至聞風潰散貽
君父憂臣惟懷遵

聖訓驕者易之弱者汰之實力訓練以期有備無患聖蒙

諭旨籌備海防邊防尙有應行調撥之處容臣熟思審處陸續籌
議具奏外謹先附片據實覆陳伏乞

聖鑒謹

奏

德國兵官換給寶星摺

光緒六年二月二十六日

奏爲遵

旨賞給洋員寶星通融酌換恭摺仰祈

聖鑒事竊查德國兵官三等提督波蘭撒爾頭等總兵薩呢則二等總兵哈克威教練華弁出力經臣奏奉

俞旨分別賞給二三等寶星欽遵在案臣即飭局仿造二等金寶星一面發給該提督波蘭撒爾三等金寶星一面分給該總兵薩呢則哈克威配帶均交駐津德國領事官傳

旨賞給旋據駐京德國使臣巴蘭德函稱前經

賞給二等寶星之薩呢則原係四等總兵此次

賞給三等寶星之薩呢則哈克威兩員係頭二等總兵其品級既高於薩羅他又爲薩羅他之上司所得獎勵未便次於屬員懇將

薩哈兩員改給二等寶星提督波蘭撤爾官居該二員之上懇改
給頭等寶星等語並接出使德國大臣李鳳苞來函所述大致相
同臣查西洋最重寶星向分等級甚繁臣請獎之時於德國官階
高下亦未深悉既有此等曲折又係奉

旨准賞之作自應通融換給因飭局造頭二等金寶星各一面割
發德國駐津領事查收轉寄即將前發三等金寶星二面換回另
存咨請總理衙門知照所有遵

旨賞給洋員寶星通融酌換緣由恭摺具陳伏乞

皇太后

皇上聖鑒訓示謹

奏

蚊船四隻撥赴南洋片

光緒六年二月二十六日

再北洋先後購到蚊船八隻前擬俟今春弁勇募齊飭調龍驤虎威飛霆策電四船撥赴南洋調遣已於去年十月撥陳海防購船摺內聲明奉有

寄諭欽遵在案今年開河後閘廠弁勇募到卽飭龍驤等四船管帶官沈有恆許壽山陳錦榮何心川開具花名月餉數目輪機槓具礮械藥彈等項清冊咨行知照並令駛往大沽口略爲操練發給燒煤借支三月分半箇月薪餉於二月二十八日起旋放洋南下該四船在津沽兩年海水浸漬船底鐵板難免鏽蝕機器等件閒有鬆損應於到滬後卽行入塢飭上海機器局督同各管帶官察看洗刮修理聽候南洋大臣調遣應需月餉藥彈等項卽自三月起由南洋照章核給理合附片具陳伏乞

聖諭謹

奏

紳捐備濟社片

光緒六年二月二十六日

再直隸頻經水旱戶鮮蓋藏必須設法籌備臣已督飭藩司任道鎔酌定章程刊發通省州縣各就情形勸捐積穀先據升任天津道丁壽昌原任天津縣知縣王炳燮勸據紳士李世珍倡捐銀五千兩嚴克寬楊俊元黃世熙楊雲章李士銘及無名氏各捐銀一千兩本擬買穀存儲該紳等以津郡若遇荒年買糧較易不如將銀發商生息以期歲歲增益又經籌賑局司道議將本省外省華商海船販糧來津者每清斛一石捐銀五釐如裝他貨亦照裝糧數目抽收在各船所捐無幾而公中積少成多併歸紳捐生息更於備荒有裨即派該紳李世珍嚴克寬等董司其事名曰備濟社計自光緒五年開河起至封河止共收船捐銀六千一百餘兩除上年水災收買紅糧棉衣查戶散放外尙存銀二千餘兩連李世

珍等倡捐銀款零星各戶捐款及所得息款統共合銀一萬四千六百餘兩該紳等現墊足一萬六千兩一併發商按月八釐生息俟續捐有款歸墊至船捐一項眾皆樂從業經辦有成效嗣後應照案將收款陸續發商生息所得紳捐船捐息款每屆冬令提出三成以濟貧窮無告之民其餘七成留爲荒年助賑之用只可動利不許動本如遇大荒必須動本亦不得過三四成此項銀兩專爲濟貧備荒而設無論地方何項公事及別項善舉概不准官紳絲毫挪用社中一切事宜責成公正紳士輪流值年妥實經理據該紳等稟請奏明立案前來臣查津郡五方雜處貧民眾多時有水旱偏災備荒尤爲急務今勸集紳捐船捐銀一萬六千兩發商生息嗣後仍照章抽收船捐本息漸裕荒年藉可接濟實屬有裨窮民自應永遠責成公正紳士經辦由地方官隨時督查至該紳

李世珍嚴克寬楊俊元黃世熙楊雲章李士銘等素殷推解見義
勇爲此次倡捐鉅款並經理船捐力成備濟社善舉且各自添備
米糧棉衣散放濟賑聲稱不邀議敘具見保全桑梓誠心爲公深
堪嘉尙除飭將辦理章程勒石垂久外所有天津縣紳商集捐濟
貧備荒緣由理合附片具陳伏乞

聖鑒謹

奏

直隸請停分發摺

光緒六年二月二十六日

奏爲直隸候補人員過形擁擠請停分發以冀肅清吏治恭摺仰祈

聖鑒事竊據藩司任道鎔臬司丁壽昌詳稱軍興以來保舉捐納各官指分來直者絡繹不絕缺少員多人形擁擠上年各省捐生因聞停捐之信紛紛趕辦其勞績捐指過班者亦復不少迄今到省人員愈眾計候補道府已有四十餘員知州知縣二百數十員河工地方同知通判九十餘員佐貳佐雜八百餘員序補無期差委更少消磨歲月苦累不堪若不設法變通勢將無所底止請奏停分發等情具詳前來臣維官多則民必擬捐納人員往往以千百之資冀獲倍蓰之利豈皆盡心爲民若僅恃考試甄別而不正本清源殊無實濟前蒙

特旨停捐仰見

朝廷澄敘官方維持政體欽幸莫名惟部議尙准分發已捐已保者實繁有徒仍必源源而至畿疆爲首善要區吏治尤宜整頓況地方素稱瘠苦又值災歉頻仍官吏充塞大非閭閻之福應請嗣後直隸一省自此次奉

旨之日起除正途卽用大挑等項例應發分人員仍照舊辦理外凡捐納勞績兩項道府以至未入流業經指捐直隸河工地方及應行發掣人員概停分發其長蘆鹽屬人員亦甚擁擠並請一律停止庶各班漸可疏通地方藉資培養俟三五年後再行察看奏明核辦理合恭摺具陳伏乞

皇太后

皇上聖鑒訓示施行謹

奏

避

自密籌防務摺

光緒六年三月初一日

奏爲遵

旨詳細籌辦密摺陳仰祈

聖鑒事竊臣承准軍機大臣密寄光緒六年正月二十一日奉

上諭一道跪誦再四仰見

宸謨廣運戒備不虞臣謹按切時勢逐條悉心籌畫上乞

聖裁

上諭天津屏蔽京師關係全局李鴻章籌防有年所有建築礮臺
購備戰船等事粗具規模著將現有兵力認真整頓等因欽此查
直境沿海大小各口皆爲京師屏蔽而天津乃各國由海道入京
正路尤須重兵駐守大沽北塘兩口則又津郡門戶年來建築礮
臺粗有頭緒惟兵力尙覺稍單其北塘迤東至山海關袤延五百

餘里如沿海之螳頭沽蒲河口金沙嘴秦王島老龍頭等處水勢較深輪船可泊以登岸徑達京城亦須分駐營壘添築礮臺昨令新調直隸提督郭松林前往察勘口岸歧出空虛可應該提督以提標練軍僅有馬步隊五營光緒二年調赴奉天防剿馬步隊各一營又調防熱河朝陽馬隊一營現止步隊兩營巡防北口實不能兼顧海防從前直省練軍借調奉天本係暫局今奉天已用調提督宋慶一軍堪資控扼則前調直津零星各隊自應撤回況近畿防務視奉省尤爲重要又郭松林向隨臣統師剿賊裁廢馬步七營留防湖北實爲久戰得力之師應請

旨飭下奉天將軍將原調古北口練軍步隊右營馬隊三哨津防練軍鎗隊兩營全數撤回不得藉詞久留並

飭湖廣督

臣

湖北撫

臣

將郭松林

舊部

現留襄陽之武毅步隊三

營馬隊一營檄調來直所需月餉軍裝仍照章由鄂源源解濟俟各營到後自北塘起東各海口當商同該提督擇要扼紮妥爲布置庶幾防較臻周密

上諭備齊戰艦於煙臺大連灣等處擇要扼紮以固北洋門戶奉天營口本屬北洋所轄該處與煙臺海防卽責成該督統籌兼顧庶幾呼應較靈又同日另奉

上諭金州海口關繫緊要應如何豫籌防守之處著李鴻章歧元會籌辦理等因欽此查大連灣一帶卽係金州海口北洋兵船本少現僅鎮北鎮南鎮東鎮西礮船四隻可爲守口利器而不足以鏖戰大洋必須戰艦備齊乃能於洋面設法扼截若船隻未齊未可固遼海門戶似

聖主必不爲空言之責成

微臣亦不敢驚虛名以兼顧目下煙臺

營口僅各有鎗隊五百人閩廠輪船各一隻兵力過形單薄幸奉旨調宋慶所部往營口等處擇要布扼山東撫臣亦擬添調勇營紫煙臺後路並訂購蚊船二隻分布海口臣飭令道員許鈴身提督丁汝昌督率現有礮船會同新延英國水師兵官哥嘉認真操練隨時駛巡營口煙臺大連灣等處聊作聲援明年所購兼碰快船二隻奧利恩八角臺鐵甲船一隻如可陸續到津屆時練成一軍擇要扼紮庶北洋門戶較爲有恃

上諭李鴻章所部淮軍久經戰陣亦宜有成望素著之宿將統帶在籍提督劉銘傳應否調赴天津著奏明辦理湖南提督李長樂如其才尙可用亦著奏調赴津以資倚任等因欽此查湘淮營制任將爲先兵非將所素習則呼應有時不靈向來淮軍統將戰功以劉銘傳爲最亦祇自統所募銘軍並未兼轄別隊而銘軍自陝

西調回後劉銘傳劉盛藻先後假歸經臣分該軍爲二一交福建提督唐定奎統赴江南分防江陰靖江宿遷一帶一由記名提督劉盛休統帶分駐山東張秋昨已調該軍北移靜海之唐官屯精濬河爲名就近調遣劉盛休樸實勇幹深得軍心尙堪倚任惟劉銘傳智略驍果度越諸將洵屬威望素著聞其在籍調養傷病尙未甚愈臣已馳函往商如可剋期赴津藉資襄助當再奏明請旨辦理至湖南提督李長樂隨臣攻戰多年向爲郭松林部下分統之將才甚可用惟郭松林所部遣撤大半僅留敗營無力添募李長樂現任專閫若調津而有將無兵轉置閒散自應暫從緩議上諭張家口一路亦宜有兵屯紮李鴻章所部淮軍現紮張秋者人數尙多著該督酌調此軍派得力將領統率前赴該處分扼要隘等因欽此查外洋之入中國通商貿易爲第一要事俄人以買

茶爲性命現僅恰克圖至張家口爲運茶要道卽至失和必無用
兵此路自絕生意之理況外隔沙漠數千里漢唐迄明皆以出塞
爲難軍行食用諸多不便我不便由此往卽彼亦不能由此來可
以揣測而知者況張家口處懸崖絕澗之內地形狹隘中外輻輳
實不宜屯駐多營張皇耳目目前明置重鎮於宣化但分零隊扼守
邊牆亦其形勢然也昨奉

寄諭祥亨等擬於精銳營洋鎗隊外由滿蒙官兵揀選馬隊精壯
四百名並令察哈爾八旗挑選精兵一千名分紮巴爾博羅柴吉
兩臺仍飭每旗再挑選精兵五百名以備應援就地練兵斯爲經
久辦法似不宜更調客軍宣化距張家口僅六十里該鎮王可陞
久歷戎行謀勇素裕現有練軍馬隊四營足資巡防臣擬令劉盛
休暫派健將帶兩三營前往宣化附近擇要屯紮與王可陞練軍

聯絡一氣銘軍大隊仍屯靜海如北邊有警兼程往援不過數日
事機可無貽誤似屬兵家活著以上各節謹就愚慮所及殫心籌
辦斷不敢徒託空言敷衍從事致負

聖明倚任之重所有一切應辦事宜容再隨時次第具陳謹先繕
摺由驛五百里密奏伏乞

皇太后

皇上聖鑒訓示謹

奏

奏調奎斌片

光緒六年三月初一日

再欽奉二月二十六日

寄諭祥亨等以直屬之張獨多三廳各旗官荒馬廠開墾已有成效若能認真查明欠交押荒銀兩責令按畝補交比戶計田派夫訓練餉需既有著落練勇即可有裨尤爲兩得之計著李鴻章遴選明幹道府前往切實查明呈報應如何籌辦之處酌核具奏等因欽此查張獨多三廳各旗官荒馬廠墾成者聞已不少責令補交押荒銀兩能否比戶計田派夫訓練必須熟悉情形之員體察勸辦若委任不得其人恐無實濟轉茲紛擾茲查有前任口北道奎斌在宣年久器識沈毅才猷明練於所轄張獨多三廳地利民情素所熟諳辦事絲毫不苟與諭翕然臣曾於同治十年十二月間密保堪勝兩司奉

臣等中在案該道川陝移

開放肅州道因病陳請開缺現病體計已就痊可否

特旨將奎斌發交臣處差遣俟其到直卽令馳赴口外切實查勘
督同各廳員妥擬章程由臣酌核奏辦理合附片具陳伏乞

聖鑒訓示謹

奏

請撥海防經費摺

光緒六年三月初一日

奏爲北洋海防經費短解日多請

飭速議籌撥以維大局恭摺仰祈

聖鑒事竊查海防事體重大非有的餉到手不能興辦一事內地
軍需或可布置於臨時稍救於事後海上設防船須預訂械須預
購人須預練且鄰國一開各國軍火均不能購運全在綢繆於未
事之先需餉如此其急而籌餉之方非中外一心共持定見不克
有濟溯自光緒元年戶部會議奏撥海防經費南北洋各二百萬
果能如數解到及今五年北洋受款不下千萬雖富強未足與鄰
相抗然北洋三口水師必有可觀緩急自有把握詎知議撥以後
未幾而抽分洋稅一半抵還西征借款矣未幾而另立招商局輪
船貨稅名目改解部庫矣又未幾而議准廣東釐金截留本省福

建稅釐留抵臺防矣在部臣屢改已撥之款若以北洋切近
畿輔防務尤要則議改一款必須議增一款以符初議乃止議抽
撥未議添撥至使外省視海防爲無足重輕解款日少一日臣於
光緒三年八月間曾將北洋餉需披瀝上陳而報解仍未有起色
如廣東江蘇福建三省釐金奉撥以來未解分毫浙海關洋稅自
月立招商局稅名日後亦未解分毫其浙江江西湖北三省釐金
及各海關四成稅實解北洋者分年勻計每年不過三十餘萬兩
視原撥每年二百萬之數尙不及十成之二臣添購利器添練勁
旅之志寢饋不忘終因款不應手多成畫餅論者猶謂臣歲糜巨
帑不克振作有爲豈知戶部所撥之額餉並非臣處所得之實餉
雖欲振作而末由今往者已不可追來者奚容再誤查上年各省
關解到北洋釐稅僅敷購置碰快船一隻之用其他訂購蚊子船

碰快船鐵甲船及緊要軍器均無指項初猶希冀

萬年吉地

惠陵工程告成各省財力稍紓解款可以加增近奉籌撥東北邊防解歸部庫之

諭其中指撥各款有與前撥北洋防費淮軍專餉相同者各省財力止有此數顧此必致失彼矧患得患失人情之常欠解部餉處分綦重孰是甘受嚴議而籌解協餉者竊恐不撥各處挪東補西專顧部餉雖蒙

恩令戶部分飭各省關將北洋防費淮軍專餉全數解足儻各省關仍前減少或更甚於前則北洋局面岌岌難支可憂甚大自今以後臣處購買製造訓練養船添募之費有日增無日減非每年有受協的數斷難籌布伏乞

聖明俯念北洋防務屏蔽

京師關繫全局北洋經費視內府泉刀尤爲緊要

特飭戶部總理各國事務衙門迅速會議所有原撥南北洋經費
粵海江海浙海山海閩海等五關四成洋稅內應行提還光緒二
年三月部庫撥給西征餉銀二百萬兩一款擬請自本年正月起
卽行停止仍照原議分協南北洋經費查此項部庫撥給西征餉
二百萬部議從二年七月初一日起於各海關奉撥南北洋經費
內劃提一半解部歸還俟解清後卽由各關統解海防大臣兌收
等因在案今計二年七月海關第六十四結以後五年八月七十
六結以前粵海關已還過部庫銀六十六萬餘兩江海關已還過
部庫銀四十四萬餘兩山海關除七十六結尙未詳報外其七十
五結以前已還過部庫銀七萬八千餘兩浙海關海兩關咨呈

處之文報不齊約略估計閩海關已還過部庫銀十五萬兩上下
浙海關已還過部庫銀八萬兩上下通計各海關五年八月七十
六結以前共已還過銀一百四十萬餘兩又截至五年年底止各
海關尚可按結提還銀十餘萬兩加以光緒二年臣於北洋經費
內發過滇案卹款銀二十萬兩原議在粵海等關應還部發西征
餉銀二百萬內扣算是各海關欠解部庫西征發款約計不過二
三十萬兩諒部臣斷不較量錙銖致梗臣議矧此欠還部庫之二
三十萬兩仍可於各省奉撥西征餉內徐議提還不致日久無著
又招商局歸併洋行輪船所納稅銀卽是從前洋船之稅華洋之
別在船不在商似不必另立名目隱佔四成稅銀地步使外省無
所適從擬請自本年正月一起所有各海關徵收招商局輪船稅銀
仍照沈葆楨李瀚章原議統按洋稅章程劃分六成四成分別報

解無庸再立五成二四成八等項瑣屑章程以裕餉源而符初議至開海關截留南北洋經費理應另指關稅補撥惟關稅可指之處甚少擬暫緩請補免致部臣爲難如此改議關稅項下南北洋兩處每處約可添收銀二十餘萬兩加以現收洋稅每處可其得實銀五六十萬兩此洋稅項下酌擬變通悉符光緒元年初議者又查各省釐金奉撥南北洋經費江西湖北各三十萬浙江四十萬湖北解數最優江西次之浙江奉撥之初解至九成近因減至二成臣此次奏改餉章專爲實事求是力戒欺飾以祛有名無實之病與其撥多解少何如實撥實解江西湖北浙江三省釐金若責令悉照原撥之數解足不足則予以嚴議猶恐各該省實有爲難之處擬請將江西湖北各原撥三十萬浙江原撥四十萬悉按八成數目實解南北洋分收不得再有絲毫短少其江蘇原撥釐

金四十萬廣東福建原撥贖金各三十萬現皆不能報解計南洋每年每處實少收銀五十萬兩蘇粵閩皆南洋轄境在南洋截本處之餉設本處之防名實尙屬相符非洋每年少此五十萬協款擬請改撥他省有著的款以上原撥改撥各款悉請比照京餉章程預定延欠處分會議奏明辦理務使每年解數實如撥數俾臣得以就款預籌不致有名無實其淮軍專餉並令如數籌解仍令各省一面起解一面自行奏報一有延欠即行懲處庶各省關皆知

朝廷意旨之所向懷然於吏議之無可幸免斯餉需可以稍裕而防務可以措手萬勿仍前虛應故事坐失事機則大局幸甚微臣幸甚所有非洋經費短解日多緣由理合繕摺由驛遞陳伏乞皇太后

皇上聖鑒敕下戶部總理衙門速議籌撥施行謹
奏

請撥南漕

光緒六年二月初五日

奏為直境窪區積水未消民情困苦懇

特恩賞撥南漕以資拯救恭摺仰祈

聖鑒事竊上年直順各屬秋禾被水共計災歉六十八州縣經臣

奏奉

上諭分別蠲緩先後蒙

恩賞給漕糧撫卹窮黎幸免失所入冬以後雨雪應時高地普種
二麥窪區仍多積水業於年前預籌春撫摺內聲明屆時察看情
形請截漕糧接濟在案臣於二月初來津經過災重之安州雄縣
任邱霸州保定文安大城靜海一帶逐處查勘窪地積水尚深文
安被淹尤廣先由江蘇紳士嚴作霖等攜帶捐資擇要散賑又寶
坻薊州涿州武清天津青縣滄州清苑高陽博野深澤安平饒陽

等州縣各有積水未消之處存麥多難補種紛紛稟請撫卹雖經
開濟河道修築隄工設法疏洩俾壯者傭趁餬口但老弱婦稚不
下數十萬待哺嗷嗷飢困可憫閭閻頻經災歉絕少蓄藏縱使水
速退消祇能布種秋稼收穫尙遠值此青黃不接實屬乏術謀生
必應妥速撫綏庶免委填溝壑此外災歉較輕州縣如因麥收失
望及應辦隄河各工亦須分別補助前以直屬各庫羅掘一空商
勸南省本省官紳集捐籌濟但賑捐至再至三久成弩末無從再
獲巨款民命至重不得不仰乞

懇施查本屆蘇浙新漕由輪船運津者現已二十餘萬石相應籲

天恩賞給江蘇浙江漕米各五萬石共合十萬石卽就輪船運來
之米就近截撥責成天津道吳毓蘭候補道盛宣懷驗收由臣督

同司道詳察順直各屬災區輕重及時分撥遴派廉正員紳會同
地方官確查戶口認真散放並酌量以工代撫務使實惠及民不
准絲毫弊混至隨漕輕贖等項及剝價銀兩經制耗食米石並請
照歷辦成案飭由各該糧道核數提扣解交賑局津貼運費本屆
蘇浙糧漕共計交倉正耗米一百十餘萬石今請截撥十萬石於
京倉似無所損而災黎藉可活命如蒙

聖明俯准

特旨宣示則

恩出自上益足固民志而廣

皇仁理合恭摺由驛具陳伏乞

皇太后

皇上聖鑒訓示施行謹

奏

請獎英法官學官廠洋員

光緒六年三月十六日

奏為船政生徒出洋肄業洋員教導出力請

旨分別賞給寶星功牌以示鼓勵恭摺仰祈

聖鑒事竊臣等接准出使德國大臣兼肄業監督李鳳苞咨開出

洋生徒歷經照章將駕駛各生先送英國格令尼次官學然後商

派兵船製造各生陸續送入法國官學官廠文案繙譯各員亦送

政治律例學院分投肄習瞬屆三年期滿官學官廠各員盡心指

授不分畛域不支薪費似宜格外獎勵其向支薪水之員延教習

幫同指教均屬出力亦應酌予獎賞西國崇尚寶星榮於華衮而

能邀他國寶星者尤以為榮中國在洋之委員生徒既傳習其交

涉駕馭製造各事擬請懇

恩酌量等差賞給寶星頒發功牌苟有糾派生徒則鼓舞之以得

其日後真傳苟無續派生徒則酬報之以免其終身德色非但有益於肄業抑且有益於邦交今與洋監督日意格往返函商力加刪汰酌擇英法官學官廠督辦總監督馬的奴得式內等共十員又英法官民各廠學總辦監督孟格非埃等十三員以上各員調派生徒延訂教導著有勤勞大半不支薪水擬請

旨賞馬的奴得式內等十員頭等金寶星孟格非埃等六員二等金寶星拉飛德等七員三等金寶星此外英法官學教習及月延教習佳臬等八員擬請四品軍功並三錢重鑲金寶牌歐般等十員擬請五品軍功並三錢重鑲金寶牌以資鼓勵而示榮寵等因前來臣等查前此德國兵官教練華弁出力經臣鴻章兩次奏奉俞旨賞給寶星此次閩廠學生在洋人數尤多事務尤繁刻下正選派生徒陸續出洋欲策後效必應酬其前勞在洋人刻意求名

不難得其祕要在中國所費無幾頗足隱示半寵謹開具銜名清單擬懇

天恩給予獎賞如蒙

俞允應由船政局照式製造寄由李鳳苞等分別頒給除咨請總理衙門知照英法駐京使臣外所有洋員教導出洋生徒請旨賞給寶星功牌緣由謹合詞恭摺具陳伏乞

皇太后

皇上聖鑒訓示謹

奏

謹將英法兩國教導肄業生徒尤爲出力各員擬請獎勵開具銜名清單恭呈

御覽

計開

法國海部總理員弁並水手人等水師提督馬的奴得式內

法國海部總理水師各廠事務提督銜薩把帖

法國格致院長巴黎地圖局副總辦並礦院總監督一品銜多布

類

法國礦院總稽查二品銜都朋

法國水師一等總監工官學總監督總兵銜舒有

英國格令官學總監督二品銜好士德

法國政治院總辦二品銜布德米

英國抱士穆德廠收發船表副將銜遜順

法國水師總監工副將卞那美

法國科魯蘇製廠督辦瑞乃德

以上十員擬請

賞頭等金寶星

法國汕薩芒製廠督辦前工部尙書孟格非埃

英國格林官學教習格致舉人藍伯脫

英國格林官學教習格致舉人勞敦

法國馬賽臘孫製廠總辦二品銜勒摩以

法國馬賽製廠監督二品銜奧賽爾

法國臘孫製廠監督三品銜臘根

以上六員擬請

賞三等金寶星

法國科魯蘇製廠副總辦拉飛德

法國汕薩芒製廠副總辦畢庸

法國地中海廠巴黎副總辦舒愛把士德

法國地中海廠巴黎總稽查芳舒

法國前寶隆官學監督基爾

法國寶隆官學監督三品銜卽格內

法國水師總監工卽浦官學副監督三品銜馬丹美

以上七員擬請

賞三等金寶星

法國水師副監工卽浦官學教習參將銜佳臬

法國水師副監工教習多郎學生奧濱

法國水師副監工前教習白海士登藝徒古士亥

法國水師副監工教習白海士登藝徒臘依德

法國水師副監工前教習削浦學生布拉

法國水師副監工教習削浦學生比俄

法國律例師前教習肄業隨員福果阿芒

法國算學舉人前教習肄業隨員福果阿貝

以上八員擬請

賞四品軍功並三錢重鑒金賞牌

英國格林官學天文教習歐般

英國海圖教習掌孫

英國製造學士汽機教習義歐

英國學士格林官學格致教習戴柏

英國格致舉人格林官學格致教習爾蘭諾得

英國水師礮學都司蘇哲爾

法國製造監工教習礮學生奧禮武

法國科魯蘇監工前教習藝徒維甫

法國礮院官學教習基爾德

法國礮院官學教習李余爾

以上十員擬請

賞五品軍功並三錢重鑒金賞牌

商局官幣分年抵還摺

光緒六年三月二十七日

奏爲各省撥存輪船招商局官幣擬於該局運酒水腳項下分年全數抵還恭摺仰祈

聖鑒事竊直隸江蘇浙江江西湖北東海關等歷年撥存輪船招商局官幣銀一百九十萬八千兩原議商股充盈卽行歸款嗣因商本未充官幣又未便久擱經臣等於光緒三年十一月會

奏緩息三年俟光緒六年起緩利拔本勻分五期每年繳還一期銀三十八萬一千六百兩由商局預爲籌定按原撥平色銀數分赴各省關局具結存案屆時照繳等因奉

旨該衙門知道欽遵在案今屆第一期應還之限據該局商總道員唐廷樞徐潤稟稱該局自光緒二年冬歸併旗昌洋行輪船後至三年六月底結帳計成本銀四百二十九萬餘兩四年六月底

結帳計成本銀四百五十七萬餘兩五年六月底結帳計成本銀三百九十八萬餘兩五年七月以後雖太古怡和洋行力與傾擠而局中生意尙能相持此成本可望日輕之情形也又該局光緒三年結帳計存官帑銀一百九十萬餘兩升作上海規平銀一百九十二萬八千餘兩商股七十三萬餘兩保險商股三十七萬四千餘兩欠旗昌洋行六十九萬兩欠華商五十六萬兩光緒四年結帳計仍存官帑一百九十二萬八千餘兩商股七十五萬一千餘兩保險商股四十一萬八千餘兩船險公積九萬六千餘兩股分存息三萬七千餘兩欠旗昌四十六萬兩欠華商八十八萬六千餘兩光緒五年結帳計仍存官帑一百九十二萬八千餘兩商股八十萬餘兩保險商股五十八萬二千餘兩船險公積十一萬九千兩欠旗昌二十六萬兩欠華商二十九萬三千餘兩五年十

二月止又拔還旗昌十萬兩東海關等官帑十二萬六千五百兩此欠款可望日少之情形也從前請緩三年後拔還官帑者原因旗昌船價六十九萬不得不先行拔還以免外人貽笑現在僅欠旗昌十六萬欠華商亦不過三四十萬氣力已漸展舒所存官帑原平銀一百九十萬八千兩除撥還東海關等十二萬六千五百兩尙存一百七十八萬一千五百兩應遵照原奏自光緒六年起勻分五期每年繳還一期銀三十五萬六千三百兩擬將輪船承運漕糧應領水腳自本年爲始五年之內全數抵還官帑查海運章程每石向發水腳等項漕平銀五錢六分一釐五毫八絲三忽三微本年奉江蘇行知與沙船一律核減三分嗣後實應發每石銀五錢三分一釐零如果每年運米六十六萬石應領水腳等銀三十五萬餘兩卽可照原議五年歸還清結萬一江廣停運江浙

撥米不能如數總當儘應收之運腳均抵應還之官帑仍以扣清之年分爲止應請飭各省糧道將此項水腳按年解存上海道庫行知該局查照各省關局每年應還平色銀數分別撥還俟官帑抵清後再將運漕水腳等項歸局自領如此辦理官帑無慮其虛懸商本亦漸冀填足惟此數年之內凡輪船運漕需用之費皆需取給於攬載客貨之中以後生意雖無一定而其盈虧在商不在官今使官帑先有著落商力無論如何總當殫心竭慮設法支持等情具稟前來臣查各省撥存該局官帑銀一百九十萬八千兩除已還外尙存一百七十八萬一千五百兩按照原奏自光緒六年起勻分五年拔還每年應還銀三十五萬六千三百兩該道等指定局船承運漕糧應領水腳等項的款卽自本年一起由各省糧道按年解存上海道庫抵還官帑尙屬急公如果海上別無警變

此項自係確有把握計嗣後運漕一石應照章實發水腳等銀五錢三分一釐零若每年運米六十六萬石應得銀三十五萬餘兩足可抵還官帑應卽照此定議仍覈成該道等隨時認真整頓節省經營務使以攬載之餘資補運漕之用費庶幾欠款日少成本日輕可固根基而期久遠除咨行查照外理合會同署兩江總督江蘇撫臣吳元炳恭摺具陳伏乞

皇太后

皇上聖鑒謹

奏

覆陳招商局移片

光緒六年三月二十七日

再欽奉正月二十八日

上諭有人奏招商局辦理毫無實濟請飭認真整頓經理一摺設
立招商局原所以收利權而裕稅課若但聽委用各員任意開銷
浪費侵蝕深恐私橐日充公款日虧著李鴻章吳元炳慎擇公正
廉潔之員將歷年出入各款澈底清查實心經理如有糜費侵漁
等情卽行據實嚴參毋稍徇隱等因欽此遵查輪船招商局之設
係由各商集股作本按照貿易規程自行經理已於同治十一年
十一月創辦之初奏明盈虧全歸商認與官無涉誠以商務應由
商任之不能由官任之輪船商務牽涉洋務更不便由官任之也
與他項設立官局開支公款者迥不相同惟因此舉爲收回中國
利權起見事體重大有碑

國計民生故須官爲扶持並酌借官帑以助商力之不足光緒三年冬曾將該局事宜籌畫整頓覆奏並飭江海關道於每年結帳時就近分赴滬津各局認真清查帳目如有隱匿據實稟請參賠業經循辦在案數年以來雖有英商太古怡和洋行極力傾擠而局事尙足相持官帑漸可拔還生意次第開拓先後承運京倉漕米各省賑糧不下數百萬石徵兵調餉解送官物軍械者源源不絕旦夕可至豈得謂於

國事毫無實濟其攬載客貨以及出入款目因會辦各員多有服官他省不能駐局仍責成某司商業之道員唐廷樞徐潤總理其事局中股本亦係該二員經手招集每年結帳後分晰開列清冊悉聽入本各商閱看稽查若該商總等任意開銷侵蝕則眾商不待官查必已相率追控而自開辦至今並無入股商人控告者局

外猜疑之言殊難憑信現值運漕攬載喫緊之時若紛紛調辦清查不特市面徒滋搖惑生意難以招徠且洋商嫉忌方深更必乘機傾擠冀遂其把持專利之謀殊於中國商務大局有礙總之商局關係

國課最重而各關各納稅課絲毫無虧所借官帑現據唐廷樞徐潤等稟定由該局運漕水腳分年扣還公款已歸有著其各商股本盈虧應如前奏全歸商認與官無涉只可照案俟每年結帳時由滬津兩關道就近清查一次以符定章惟總分各局及碼頭船隻甚多用人甚眾難保一無糜費臣等仍隨時嚴飭該員唐廷樞徐潤認真整頓實力經理不得稍任浪費侵蝕違則嚴行參辦謹會同署兩江總督江蘇撫臣吳元炳附片覆陳伏乞

聖鑒謹

奏

請緩釐課奏銷摺

光緒六年三月二十七日

奏爲援案請緩長蘆木屆正課奏銷以卹商艱恭摺仰祈

聖鑒事竊據長蘆鹽運使如山詳稱蘆商正課例限五月奏銷自

同治十年後疊遭災歉節經詳請

奏准緩至十月啟徵茲以例限將屆催令各商完納據通綱商人

晉有孚等稟稱如果銷路漸暢商力稍舒自應依限輸將何敢瀆

求展緩無如頻年水旱災傷戶口減少且硝鹽到處皆有貧民就

地取食往往不買官鹽遂致銷路壅滯近又因銀價貴賤不同賠

累益甚如豫省銀每兩值制錢一千八九百文直屬各州縣亦合

制錢一千六七百文惟津郡則止值制錢一千五百上下各商由

引地買銀來津每兩須賠制錢一二百或三四百文刻下春運既

宜趕辦去歲未完帑利及帶徵正課亦均到限於辦運喫緊之際

尚須完此數款已屬萬分拮据本屆正課奏銷實難依限籌措額懇援案展緩該運司詳加體察委係實情如將本屆正課依限奏銷徒事參追無裨實濟仍議緩至十月啟徵等情具詳請

奏前來臣查長蘆正課前因商情艱窘請展緩均經奉

旨允准現值餉需支絀但可依限催納豈容稍事稽延實緣災荒之後銷路仍滯又兼引地銀價昂貴賠累益多且當春運喫緊力難同時並辦自應援照歷屆成案籲懇

天恩俯准將光緒六年正課奏銷緩至十月辦理屆時當督飭運司認真催徵以濟京奉各餉不致貽誤理合恭摺具

奏伏乞

皇太后

皇上聖鑒訓示謹

癸

毅軍非調請加餉摺

光緒六年三月二十八日

奏爲毅軍調赴奉天應請仍由豫省照章加給月餉以作士氣恭摺仰祈

聖鑒事竊臣欽奉二月十一日

寄諭宋慶所部毅軍調赴奉天扼要防守該軍所領口糧應如何照現放章程酌量加增以示體恤由岐元會商李鴻章奏明辦理豫省向來應支該軍月餉仍著涂宗瀛如數源源接濟毋令短缺等因欽此遵查各省官兵調赴他省防剿向有加餉之例誠以行軍需費較繁不比就地可以節省宋慶所部毅軍與張曜所部嵩武軍同爲豫省之師該兩軍餉章向歸畫一其在本省原領餉數本少每營馬隊月領餉乾銀一千七百九十餘兩步隊月領餉銀一千八百四十餘兩僅敷口食同治七年冬西征案內經前河南

撫臣李鶴年奏定馬步隊每營由豫月加餉銀五百兩應加運費不在其內光緒元年毅軍出陝北撤回又經前護河南撫臣劉齊衡奏請暫停加餉聲明嗣後如越境防剿再行加增嗣因豫境旱荒糧食購運維艱又將每營運費二百兩照舊籌撥各在案今高武軍出關後仍由豫省月給加餉而毅軍遠赴奉天越境辦防事同一律涂宗瀛來緘亦謂該軍遠出正餉必不敷用現在宋慶行抵天津面商一切其步隊八營馬隊一營分作兩起次第入直前進軍士長途跋涉食用不足未免動形掣肘據宋慶呈稱餉項尙未照加弁勇同深企望勢難待至到防以後請卽奏明自三月起由豫照章加發等情前來臣查豫軍出境加餉係歸該省供支是以高武軍現仍加撥毅軍此行較前次防剿陝回艱遠相等自應准其援越境加餉之例以鼓勵軍心惟是部庫拮据既無可整發

奉省艱窘尤無可挹注豫軍向食豫餉雖豫省入不敷出亦有爲難而既有加增舊章前已照辦後更無所推諉涂宗瀛素顧大局諒必督同司局勉力籌濟相應請

旨敕下河南撫臣涂宗瀛查照李鶴年劉齊銜奏定出境加餉章程銀數將毅軍馬步隊九營每營每月應加餉銀五百兩卽自本年三月拔隊之日起隨同正餉運費一併籌撥源源解濟以作士氣而示體恤理合會同

盛京將軍臣岐元恭摺由驛具陳伏乞

皇太后

皇上聖鑒訓示施行謹

奏

李文忠公奏稿卷三十六